

O LE SULU SAMOA



EKALÉSIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA NOVEMA 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

32 FAAU'U MAI LE KOLISI FAAFAIFEAU MALUA 2022



Filifili Malifa AM, se tasi o le au faau'u, faatasi ma matua, Ekalesia ma aiga sa tapuai

OSIGA FEAGAIGA EFKS SAOLUAFATA



Susuga Misipalauni Faatau FT, ma le Faa-feagaiga EFKS Saoluafata, Onosa'i Soo FS & Toafa

FAASINO UPU

1. O LE LAUGA	2
2. NA O AFIGA E TULEI MAI	4
3. TALAAGA O LE AU FAAU'U	5
4. O LE PEROFETA MULIMULI	8
5. OSI FEAGAIGA SAOLUAFATA	12
6. O E UA FAI I LAGI FOLAUGA	13
7. ATA O E UA MALILIU	16

O LE LAUGA

Tusi Faitau: 1 Tupu 1: 1 – 18

Matua: *“O Atonia, o le tama tane a Akita, ua faamaualuga o ia, ua faapea, “Ou te fai ma tupu.” Ua ia faia foi mona o le nofoa faataavalevale, ma ē tietie i solofanua, ma tagata e toalimagafulu e taufetuli i ona luma.”*

Manatu Autu: **Ua taumafai Atonia ia avea o ia ma tupu.** (*Adonijah sets himself up as king*).

Ua iloga auala aloaia e avea ai se tagata ma ta'ita'i, o se tupu, Ao o le Malo, Palemia, Taitaifono... O Malo faatemokarasi e pei o tatou i Samoa, ma Ekalesia Kerisiano pei o le tatou EFKS, o le auala masani e filifili ai taitai, o le palota a tagata lautele ma usufono, e saili ai lē e fulisia i ai finagalo o tagata. O tofiga e faia e tusa ma le faasinoga a le Faavae, e lima ta'ita'iina ai malo ma soo se faalapotopotoga. O lea foi le tulaga i totonu o aiga, e saili e suli sē ua agavaa na te umia le suafa, e faasa'osa'o ma tausi le aiga. O auala amiotonu uma, ua faitauina o le finagalo lea o le Atua, ma tofiga mai le Atua.

Pe afai e tofia se tasi i se isi auala ese e lē tusa ma lenei faavae, ona iloa lea, o le natura faatiapolo lea na amata mai Etena – na faaoso ai e le gata Atamu ma Eva e 'ai le fua o le laau na faasā e le Atua, ma fai ane 'Lua te lē oti, a e pupula o oulua mata, e avea oulua e pei o ni atua...' O auala ia faatiapolo, e amiolētonu, fai faamalosi ma faa-solitulafono, e lē tusa ma le finagalo o aiga, a e tofia i le pule faitoatasi ma le pule faa-Hitilā (e pei ona faaigoa lautele ai). O le iuga, e tula'i mai faaputuga faafitauli, o vevesi ma maseiga, o taua ma misa, e oo lava i le toto masaa ma fasiotiga tagata.

E faapena le tulaga na oo i ai le nofoalii o le nuu o le Atua i le amataga o le faigamalo Soofaatasi a ituaiga

e sefulu ma le lua o Isaraelu, i le taitaiga a le tupu o Tavita. Ua taoto nei o ia, ua afu lelea lona soifua, ona tula'i atu lea o se tasi ona atalii o Atonia, ma faapea ane, 'O a'u la le tagata e sosoo ai i le nofoalii, o a'u o le a fai ma tupu, e sosoo ma Tavita ua lē toe aogā, ua lata ina oti. Mata o se taupulepulega ua leva ona fafau i lona mafaufau tu'inaanu. Atonu e faitau nisi, e talafeagai le tofiga ua fai e Atonia, ua fai ai e ia o ia lava ma tupu. O loo ta'ua o se taule'ale'a e aulelei lona tino, lona uiga e malosi ma ola maloloina. O ta'ua foi o se tama e amio lelei talu ona itiiti, e lē faalogogātā pe ulavale. A o le itu e sili ona agavaa ai Atonia, o ia le aupito matua i suli o Tavita i lea lava taimi. I le faasologa o suli, e matua Amanono le tama a Ainoama; a ua oti o ia e pei ona sa toe fasiotia lava e lona uso o Apisaloma. E lona lua le tama o Kiliava/Tanielu, le tama a Apikaila, e lē iloa poo fea sa ola a'e ai, atonu sa i le aiga o lona tina, e le'i i ai se faitauga a Atonia i lea uso. O lona tonu o atalii o Tavita o le tama a Apisaloma, le tama a Maaka, ua maliu foi o ia (le tala i lana fouvale i le faigamalo a Tavita, na tautau ai i le laau felefele). Lona fa ai loa Atonia, le tama a Akita. Ma o ia lea ua aupito matua ai, i suli o i totonu o le aiga, ma le maota o le tupu. O isi tama laitai mai isi faletama a le tupu o Tavita, e i ai Sefatia, Itereamu ma isi, o small boys i le vaai a Atonia. Faatasi ai la ma Solomona le tama a Patisepa. O i latou uma nei o suli, ma e agavaa uma i le tofi o le avea ma tupu o Isaraelu, pe a fua i le faasinoga a le faavae, ua uma ona faataatia e le Atua ia Samuelu, faapea foi ia Tavita, i le avea ai o lona aiga, e fai ma tofi filifilia o le Atua.

Peita'i, e le'i manatu ai Atonia i auala faatemokarasi, e tālo se feiloaiga e soalaupule, filifili saoloto e tusa ma aiā tatau; a o le auala pulepule tutū, fai faalilolilo, faausaili ma le faapito, o auala ia ua ia uia e fai ai o ia ma tupu. E lē o se faiga lelei lea, a o se auala leaga ma sesē, o se auala faa-tiapolo, e faatupu maseiga, faatupu vevesi, e fevaevae'i ma tutupu ai misa ma taua. E lē o se auala faa-le-Atua. O auala ua faavae i le loto fefete, faamaualuga, e pei ona molimau mai le matua, *“O Atonia..ua faamaualuga o ia.”* Ua fai lona nofoa faataavalevale, tofofi i latou e tietie i kariota solofanua e faafeao ma tamomo'e i ona luma. Ua i ai ma i latou na lagolago i lana pule, o i latou foi e tutusa le matape'ape'a i tofi, tu'inaanu i manuia pe a tu le faiga malo. Ua fai taumafataga, faafiafiaga ma fa'aaloaloga maualuluga, o faalauiloa ma faatosina. Ua amata le fai vaega, o le fai kegi, faa-itu'au i totonu o le aiga ma le malo o le nuu filifilia o le Atua.

O le a le i'uga o lenei faiga, lenei auala ma le tofiga a Atonia e ia o ia lava e fai ma tupu? Na i'u vale, e le'i taunuu, e le'i aloa'ia, pe faamaonia. Mulimuli ane ona fasia lea o ia ma oti ai. A e tofia Solomona e fai ma tupu, na tofia e Tavita, lagolagoina e le faigamalo soofaatasi a Isaraelu, a e faamaonia, faamamalu ma faamanuiaina e le Atua. E lē masani ai Tavita i nei faiga ma ia auala faa Atonia; na te le'i a'oa'oina ai lana fanau. Ua silafia e Tavita, e faaea e le Atua le tagata faamaulalo, a e tete'e o ia i le tagata faamaulaluga, e faalēaogā e le Atua le tagata loto fefete ma taupulepule leaga. Na lagi ai ana pese ma fatuga o ana Salamo, *“Amuia le tagata e lē savali i le filifiliga a e amio leaga, e lē tu foi o ia i le ala o e agasala, e lē nofo foi i le nofoa o e tauemu.”* *“E te amio alofa oe i e ua amio alofa, a o e ua mata faasiasia, e te faamaualaloina i latou.”* Mea ia e le'i oo i ai le iloa o Atonia.

Sa manatu Atonia e mafai ona ia umia le paoa i le tele o ana solofanua ma kariota, o le tele o oloa ma le tamaoaiga, i le lagolago malosia a uō ma paaga toatele e mau tulaga i le malo ma le atunuu. Sa manatu i auala faatogafiti, o auala o le faatosina, totogi tagata, faavalea tagata, tafale ma fa'aaogā tagata. O auala e soli faavae, e mimilo faavae, ma faauiga sesē faavae ia fetau ma lona mana'o. Peita'i mo Tavita, o le malo ma le mamalu, o le pule ma le faaeaina, o mea totino a le Atua, o ni mea e nonō mai le pule aoao, le pule amiotonu, le pule alofa a le Atua. E fai mo le tagata e mata'u i le Atua, e usita'i i le finagalo, ma ola faatuatua i auala faale-Atua. O auala ia e talafeagai ai le mataupu, o tofiga ma le pule e mai le Atua.

E tuufaafegai le loto fefete faamaulaluga, ma le loto maualalo e agamalū. E tuufaafegai le mea na fai e Atonia, ma le mau a le aposetolo, i le faata'ita'iga sili o le loto maualalo, le auala e faapaleina faaeaina ai, le tagata faamaulalo. Le faataitaiga sili ua fa'aali mai e Iesu, o le Tupu o tupu, o le Atua moni ua liu tagata. E ui ina o Ia o le Atua silisili ese, a e le'i manatu o se mea e 'u'u mau ma taofiofi mamau i ai. O le Silisili ese ua faamaulalo teisi, ua fanau mai i se auala maualalo, ma soifua o se tagata pei o tatou. E lē gata i lea, a e sa ususita'i ma tautua faamaoni, o le auauna e pologa. Na fai le faiva o le tautua sei oo lava ina malui i le satauro, o se tulaga e sili ona ta'uvalea ma inosia.

Fai mai le aposetolo, *“O le mea lava lea ua matuā faaeaina ai o Ia e le Atua, ma foa'iina atu ai ia te Ia o le suafa e silisili i suafa uma lava; ¹⁰ina ia tootuli o tulivae uma lava i le suafa o Iesu, o e o i le lagi, ma e o i le lalolagi, ma e o i lalo o le lalolagi; ¹¹ma ia ta'uta'u atu e laulaufaiva uma lava o Iesu Keriso o le Alii lava ia, ia i'u ai i le viiga o le Atua le Tamā.”*

Le au faatuatua faitau Sulu Samoa ma le Ekalesia pele a Iesu Keriso, o le feau faamanatu a le Tala Lelei e ala i lenei mataupu, ina ia tatou 'alo'alo ese mai auala faa-Atonia, na ia taumafai ai i uluai aso o le Malo Soofaatasi. Le auala ua faafia ona uia e nisi foi tagata leaga toatele o le lalolagi. Le auala ua oo mai nei lava o molimauina le taumafai pea o nisi, i totonu o aiga, o faiga malo, ua oo lava i le Ekalesia o le Malo o Keriso, o aliali mai ai pea. A o se auala ua molimauina le i'uvale i le malaia, o le toilalo faalumaina, o le faamāmāsagia ta'uvalea, ma tuulafoa'iina e tagata faapea le Atua. Pe afai foi o loo e aafia ai i nei ituaiga auala i sailiga tofi ma faiga filifiliga, ia salamō nei ma liliu ese ai. Ia fai le mea lelei e tasi na fai e Atonia – *“⁵⁰na ia mata'u ona o Solomona, ona tula'i lea o ia ma alu, ma tago atu i nifo o le fata faitaulaga.”* O nifo o le fata taulaga e sausuina i le toto o le tama'i mamoe; na tago atu ai Atonia, ona faasaina lea o ia e Solomona. O lo tatou salamō faamaoni, e 'alo ese mai auala pi'opi'o, ma pa'i atu e ala i le faatuatua i le toto o le Tama'i Mamoe, e faasaina ai i tatou i Lona alofa mutimutivale.

A ua a'oa'o mai le faataitaiga sili ua faia e Iesu lo tatou Alii, ma o ana a'oa'oga foi ia i le loto maualalo mo le soifua lelei o aso uma, a o se auala e maua ai le sootaga lelei, le nofo fealofani ma filemu o tagata uma. O lalo lava e maua ai malo. E faaeaina le loto maualalo, a o le loto fefete faamaulaluga, e oo lava i e a'oa'oina soo a e faama'a'a pea, e faafuase'i ona nutimomoia. Lenei foi masina sa feagai le Ekalesia ma faiga taulaga, ua faamalo le galulue ma tautua foai mo le Atua. Ua outou faia le mea sili, e tali atu ai i le taulaga silisili na faia e Keriso mo lo tatou faaolaina. Ia ia te Ia le viiga e faavavau. Amene.

Saunia: Faitoaga Tolua FS
Faatonu Sulu Samoa
(E sui ai le Lauga na atofa o le masina)

NA O AFIGA E TULEI MAI FOFOGA O LE ALII

UA TOE FAATUINA OE E LE ATUA

“⁴Ua faafofoga e Iesu, ona faapea lea o ia, “O lenei ma’i e lē i’u ina oti, a ona o le viiga o le Atua, ina ia viia ai o le Atalii o le Tagata.”

Mai le tala i le toe faatuina mai o Lasalo n ai e ua oti, tatou te maitauina ai nisi o faamanatu:

(1) *O i ai le fuafuaga a le Atua mo oe, e te lē o iloa.* Aiseā na faatali ai Iesu mo aso e lua, ina ua faalogo ua ma’i Lasalo, ona faato’ā alu lea e asi? Na faatali o Ia ona o lenei:

(a) *Ina ia faamalosi atili lou faatuatua.* Na fetalai Iesu, *“¹⁵Ou te olioli foi ona o outou, ina ua ou lē i ai, ina ia outou talitonu mai;”* O tatou i ai i se lalolagi ma se olaga e tumu i toatūgā, e o atu ma o mai. O le isi ou faalavelave o le a sosoo ai, o le a ese mai lea ua tuana’i atu, mata o le a sili atu ona tiga; peitai o le mea e tasi e tatau ona tumau lona malosi, o lou faatuatua.

(e) *Ina ia viia ai le Atua.* O le talitonuga o le au faresaio, e tuua e lou agaga lou tino oti i le aso lona fa. Pe ana fai e taunuu atu Iesu e le’i atoa lona fa o aso, ma toe faaola Lasalo, latou te fai ane, e le’i oti atoatoa o ia, auā e le’i atoa le fa o aso. O le uiga lea o le fetalaiga a Iesu, *“O lenei ma’i e lē i’u ina oti, a ona o le viiga o le Atua”.* Pe afai e te toe tepa i tua i mea na tutupu, ona e iloa ai lea o le mafuaaga na faapea ai, ma le atamai o le Atua ma lona finagalo paia sa galue ma faatonutonuina ai fuafuaga uma.

(2) *O le a tuu atu e le Atua ia te oe, lua te fesaga’i ma mataupu sa e taumafai e tanumia.* Ina ua fetalai atu Iesu ina ia ave’ese le maa, na tali atu Mareta, *“Le Alii e, ua oo ina manogi, auā o lona po fa lenei.”* O e tatalo mo se tali i se tasi itu, a o fetalai le Atua ia te oe ina ia aveese le maa ma ia lua fesaga’i ma se faafitauli sa e tanumia i se isi itu? Pe afai e sa’o lou loto ma le Atua, o le a tali leleia mai au talosaga. *“²²Afai e le faasala o tatou loto ia i tatou, e maua ai e i tatou le loto tele i luma o le Atua. ²³O mea uma foi tatou te ole atu ai, e maua mai ia te ia, auā ua tatou tausi i ana poloaiga.”* I Ioa.3.

(3) *E fai oe e le Atua ma faata’ita’iga o lona alofa tunoa.* Tatou vaai faalemafaufau ia Lasalo ina ua toe ola mai. E leai se upu na te tautala ai, a e ua lava lona tu ma savali ane, o lona tagata ola ua fai ma molimau i tagata uma, o Iesu le Keriso. Ma e faapena foi ia te oe. Ua toe faaola ma lavea’iina mai oe e le Atua, ina ia fai ma molimau ola o lona alofa tunoa.

(4) *O a mea ua leiloloa, e mafai e le Atua ona toe faafoisia mai.* O se tasi o folafolaga silisili i le Tusi Paia, e faasino i le Atua na te mafai ona toe faafoisia mai ia te oe o tausaga na faoa e le soifuaga nei. Faataitaiga o le folafolaga, *“²⁵Ou te tau i atu ia te outou o tausaga na ‘aina e le sē akerise, ma le sē aleka, ma le sē kasili, ma le sē kasama, o la’u itu taua tele na ou auina atu ia te outou.”* Ioe.2. Ia e fai mo oe lona folafolaga; ave i le nofoaga na leiloloa maumau ai le tele o lou soifuaga, ma tatalo i le Atua ina ia suia, faafoisia ma faafou. E mautinoa e faia e Ia.

(5) *O a mea o loo saisaia oe, e mafai e le Atua ona faasaoloto mai ai oe.* Na valaau atu Iesu ia Lasalo e sau i fafo. *“⁴⁴Ona alu ai lea i fafo o lē na oti, ua fusifusia ona vae ma ona lima i fusi... Ona fetalai atu lea o Iesu ia te i latou, “Tatala ia ia te ia, ina tuu atu ia e alu.”* O aso nei, ua sili atu ona malosi le mana o le Atua nai lo soo se amio, masani, tu ma aga o loo saisaitia ma noatia ai oe. E ui ina e lē matuā malamalama ai lou mafaufau, a e ia tali atu i ai lou faatuatua. *“³⁴Ia e a’oa’o mai ia te au, ona ou anaana lea i lau tulafono, ma ou tausia ma lo’u loto atoa. ³⁵Ia e ta’ita’iina atu a’u i le ala o au poloaiga; auā ou te fiafia lava i ai.”* Sala.119. Pe afai e te tatalo i le tatalo lea, o le a tupu lou faatuatua, ma mea uma sa faafaigatā e leai se faamoemoe, e suia ma gafatia i le mana o le Atua.

(6) *O le ā le leaga ma tiga o ou lagona, e malamalama lelei i ai le Atua.* I le maliu o Lasalo, na tutulu ai Iesu. *“Ona faapea ane ai lea o Iutaia, “Faauta i le tele o lona alofa ia te ia!”* O le tala lenei ua faamaonia ai o le Atua o tatou auauna i ai e lē gata ina mafai ona Ia toe faafoisia mai mea na leiloloa, a e amanaia foi ma mamafa ia te Ia o tatou lagona ma faafitauli o feagai ai (Eperu 4:15). O le mea lea, pe afai o loo e tiga ma mafatia, liliu atu nei ia te Ia na te fesoasoani mai ia te oe. Na te talituaalimaina lau faatoga mamate, a e talia mai.

TALAAGA O FAIFEAU MA A'OA'O FAAU'U MAI MALUA 2022

DIPLOMA OF THEOLOGY

A'oa'o: Falevaai Ah Kuoi
Nuu: Toamua
Galuega sa galue ai: CSL technician
Faletua: E le'i faaiipoipo
Aulotu na su'e ai: EFKS Toamua
Matagaluega: FALEATA

A'oa'o: Filifili Malifa
Nuu: Nuu fou, Safotu, Sapapalii.
Galuega sa galue ai: Malu o le Malo
Faletua: E le'i faaiipoipo
Aulotu na su'e ai: EFKS Ululoloa & Siusega
Matagaluega: FALEATA.

A'oa'o: Ioane Vaiao
Nuu: Fasitoo-tai
Galuega sa galue ai: Faiaoga
Faletua: E le'i faaiipoipo
Aulotu na su'e ai: EFKS Fasitoo-tai
Matagaluega: AANA

A'oa'o: Pio Galu
Nuu: Elise
Galuega sa galue ai: Seila
Faletua: Taeamo
Nuu: Tuvalu
Aulotu na su'e ai: Sikolasipi mai Tuvalu.

BACHELOR OF THEOLOGY

A'oa'o: Apelu Isaia
Nuu: Tuanai
Galuega sa galue ai: Fisheries
Faletua: Crystal
Nuu: Tafua, Lufilufi.
Aulotu na su'e ai: EFKS Tuanai
Matagaluega: MALUA

A'oa'o: Collin Faletoes
Nuu: Apia, Solosolo.
Galuega sa galue ai: Banker
Faletua: Aifala Mataafā Esau Pesaleli
Nuu: Vailoa Palauli
Aulotu na su'e ai: EFKS Apia
Matagaluega: APIA

A'oa'o: Fafoi Atonio
Nuu: Iva
Galuega sa galue ai: EPC
Faletua: Tulaga
Nuu: Fusi Safotulafai
Aulotu na su'e ai: EFKS Iva
Matagaluega: FAASALELEAGA

A'oa'o: Fraser Tauaivale
Nuu: Salua Manono, Vaitoomuli, Vatia, Aunuu.
Galuega sa galue ai: Youth Development
Faletua: E le'i faaiipoipo
Aulotu na su'e ai: EFKS Agape-Garden Grove
Matagaluega: AMERIKA

A'oa'o: Gaolo Elisara
Nuu: Saoluafata, Falevao
Galuega sa galue ai: Malu o le Malo
Faletua: Shirley Slade
Nuu: Gautavai, Moataa.
Aulotu na su'e ai: EFKS Moataa
Matagaluega: VAIMAUGA.

A'oa'o: Joshua Leatigaga
Nuu: Gagaifo, Fasitoo-uta, Salelologa
Galuega sa galue ai: Sales & Marketing Manager
Faletua: Ataata Leatigaga
Nuu: Utualii, Vaimoso, Saasaa, Lalomanu, Falelatai
Aulotu na su'e ai: EFKS Springfield Lakes
Matagaluega: KUINISELANI

A'oa'o: Maotua Upulasi
Nuu: Manunu, Salesatele, Sasina, Auala
Galuega sa galue ai: Security
Faletua: Olevia
Nuu: Salesatele, Manunu, Sauniatu
Aulotu na su'e ai: EFKS Salesatele
Matagaluega: FALEALILI SAFATA SIUMU

A'oa'o: Matthew Tagaloa
Nuu: Afega, Lalomalava, Ulutogia, Falevao,
Maugafiafia Vailele.
Galuega sa galue ai: DJ
Faletua: Valma
Nuu: Satupaitea, Gautavai, Lepa, Sala'ilua,
Lotofaga, Papa Puleia, Papa Sataua, Samatau,
Manunu Letogo.
Aulotu na su'e ai: EFKS Condell Park
Matagaluega: NIUSAUELESE

A'oa'o: Mika Su'esu'e
Nuu: Poutasi, Vaimoso
Galuega sa galue ai: Ofisa o Tiute
Faletua: Taliilagi
Nuu: Malaemalu
Aulotu na su'e ai: EFKS Poutasi
Matagaluega: FALEALILI SAFATA SIUMU.

A'oa'o: Nepo Anane
Nuu: Matautu Falelatai, Falealili
Galuega sa galue ai: Ofisa Femalagaiga
Faletua: Fuifui
Nuu: Faleasiu, Lepa.
Aulotu na su'e ai: EFKS St Marys
Matagaluega: NIUSAUELESE.

A'oa'o: Oata Leiataua
Nuu: Faleasiu, Tanugamanono
Galuega sa galue ai: Malu o le Malo
Faletua: Tuafale
Nuu: Sagone, Faleasiu.
Aulotu na su'e ai: EFKS Faleasiu
Matagaluega: MALUA.

A'oa'o: Otele Vaa
Nuu: Vaovai, Vaisala.
Galuega sa galue ai: Factory Hand
Faletua: Rerepairere-o-Mere
Nuu: Vaipae, Aitutaki Cook Island
Aulotu na su'e mai ai: EFKS Newcastle
Matagaluega: NIUSAUELESE.

A'oa'o: Paul Mulitalo
Nuu: Vaiala, Safotu
Galuega sa galue ai: Matagaluega o Tupe
Faletua: E le'i faaipoipo
Aulotu na su'e ai: EFKS Vaiala
Matagaluega: VAIMAUGA

A'oa'o: Russell Ieremia
Nuu: Salelologa, Vaivase-uta
Galuega sa galue ai: Bluesky Technician
Faletua: E le'i faaipoipo
Aulotu na su'e ai: EFKS Apia-uta
Matagaluega: APIA

A'oa'o: Sa Utaiaana
Nuu: Lepa
Galuega sa galue ai: Offset Printing
Faletua: Silau Wright-Utaiaana
Nuu: Lalomanu, Leusoalii
Aulotu na su'e ai: EFKS St. Marys
Matagaluega: NIUSAUELESE

A'oa'o: Vite Kalepo
Nuu: Malie
Galuega sa galue ai: Ofisa o le Fono
Faletua: Ferite
Aulotu na su'e ai: EFKS Malie
Matagaluega: MALUA.

BACHELOR OF DIVINITY
with HONORS

A'oa'o: Faafetai Koria
Nuu: Saleimoa
Galuega sa galue ai: Malo
Faletua: Jedda
Nuu: Vini fou
Aulotu na su'e ai: EFKS Vini fou
Matagaluega: APIA.

A'oa'o: Hobert Sasa
Nuu: Saipipi, Satoalepai.
Galuega sa galue ai: Faiaoga
Faletua: Pepe
Nuu: Saleilua
Aulotu na su'e ai: EFKS Saipipi
Matagaluega: FAASALELEAGA

A'oa'o: Laau Mila Tanielu
Nuu: Vaiala
Galuega sa galue ai: Inisinia
Faletua: Faalaniga Tanielu
Nuu: Satupaitea, Fogatuli
Nuu na su'e ai: EFKS Blockhouse Bay
Matagaluega: AUKILANI

A'oa'o: Limuaa Kolise Vaa Feagaiu'e
Nuu: Saoluafata, Salani, Matautu Falelatai, Papa Puleia.
Galuega sa galue ai: Faiaoga
Faletua: Kate Lomialagi Laki
Nuu: Talimatau, Sasina, Faleasiu, Vaiee
Aulotu na su'e ai: EFKS Saoluafata
Matagaluega: APIA SASA'E

A'oa'o: Pelenato Liufau
Nuu: Manono, Auala
Galuega sa galue ai: Pule Aoga Tusi Ata EFKS
Faletua: Sendra Susana Gutu Uili Mati
Nuu: Faleasiu, Moataa
Aulotu na su'e ai: EFKS Avata, Falealupo
Matagaluega: ITU O TANE

MASTER of THEOLOGY

(Mo le ulua'i taimi, i le tala faasolopito o le Kolisi Faafaifeau Malua & EFKS)

1. Suafa: Susuga Alo Pita FS & Mili
Nuu: Faafeagaiga EFKS Fusi, Saoluafata
Matagaluega: APIA SASA'E
2. Suafa: Susuga Too Tua FS & Epenesa
Nuu: Faafeagaiga EFKS Tafagamanu
Matagaluega: AANA
3. Suafa: Rev. Beretia Unnang
Nuu: Sikolasipi mai Kiribati
4. Suafa: Rev. Teratabu Takaria
Nuu: Sikolasipi mai Kiribati
5. Suafa: Loia Jr. Fiu Kolia & Esther
Nuu: Matautu-uta Apia.
Matagaluega: APIA
6. Suafa: Dominic Taeleipu
Nuu: Afega
(E le'i faaipoipo)
Matagaluega: MALUA
7. Suafa: Tavita Simi Reupena & Logosau
Nuu: EFKS Aleisa Sisifo
Matagaluega: FALEATA.

Ia silafia:

O Faiaoga Sikolasipi a le Ekalesia mo le tausaga nei, o le susuga Kara Ipuniu FS mo le faailoga o le Foma'i (PhD) i le University of Divinity, Melepone Ausetalia, ma le susuga Tutoatasi Toalima FS mo le faailoga foi o le Foma'i (PhD) i le Victoria University, Ueligitone Niu Sila. O A'oa'o Sikolasipi a le Ekalesia mo le tausaga nei - Faafetai Koria, Hobert Sasa ma Fraser Tauaivale, mo faailoga o le Master of Theology. Ia manuia le faamoemoe.

NA O AFIOGA E TULEI MAI

“⁴⁷O le taua lenei a le Alii, na te tuuina mai outou i o matou lima.” 1 Samu.17.

Ina ia tau le taua faasaga i sau'ai faa-Koliata, e pei o le faapologaina e le ulaula tapaa/ava malosifualaa oona, popolevale, fefe, tu'inaanau, ita, loto leaga ma isi, e tatau ona e malamalama i afioga paia nei a le Atua:

(1) *O tofotofoga i lou olaga e lē ese mai tofotofoga o loo feagai ma isi foi tagata (1 Kori.10:13). O Koliata sa fanau mai o se pepe meamea, peita'i na tupu a'e ma avea ma sau'ai. O tatou sau'ai o nai mea sesē ma agasala itiiti, sa tatou lē amanaia ae manatu māmā i ai, seia oo ina latou tutupu pea ma fai fai tetele, ma ua toe foi mai e faafefe ma faamata'u i tatou. O lona uiga, pe afai e amata ona e tete'e atu i nai mageso laiti ma mea faigofie, e te maua foi le malosif e te fai atu ai “leai” i faaososoga tetele ma malolosi.*

(2) *A o faalatalata atu le Filisitia e faafetaia'i ia Tavita, “⁴⁸ona faataalise lea o Tavita, ua momo'e atu i le itu taua e faafetaia'i i le Filisitia.” Na faafetaui faafesaga'i lelei e Tavita le sau'ai o Koliata. E tatau ona e taumafai malosif e tata'i mai lau sau'ai i fafo i le malamalama, a e 'aue le tuua o ia i tua e saga taufaafefe mai i lou olaga. Ia fai tua'oi, tosi le laina! Pe afai e talafeagai, faasoa i se tasi e te faamoemoeina, e faamalosi mai ma lagolagoina oe. Faamamao ese mai tagata sesē. A o le itu sili, 'aue le vaai i le Atua e tusa ma lou faafitauli, a e vaai i le faafitauli e tusa ma le finagalo o le Atua.*

(3) *“O le taua lenei a le Alii, na te tuuina mai outou i o matou lima.” E te lē o fusu na o oe i le taua o loo fai. E finagalo le Atua ina ia e faatoilaloina amioga ma masaniga tuai e leaga, ma ia fausia nisi amio fou e lelei. O lona finagalo mo oe, “⁴⁹ia e savali ia tusa ma le valaau ua valaauina ai oe.” Efeso 4. Pe afai e te salamō, e liliu ese mai amioga tuai ae faasaga atu i le Atua ma lua savavali faatasi, ona ia avatu lea ia te oe o le malosif e te faatoilaloina ai le sau'ai o loo fai ma taufaafefe, ma faapologaina oe. E oo mai nei, e le'i i ai se taua a le Atua ua faiaina. Pe afai e te valaaulia o Ia e fai ma au auupega, e tau i lona suafa, e fai mou talitā e tali pupuni, ona mautinoa lea o lou manumalo ma faaeaina. FS*

O LE PEROFETA MULIMULI

(O le Tala Faa-fagogo faasolo ua faa-Samoaina mai tusi The Last Prophet tusia e James Rollins)

Na tālo atu Penita ia Karai e toe sulu lana auupega. Na ia lagona e leai se lamatia o i latou mai le tamaloa. Na o se sauniuni lava ma mataala.

Na laa atu i luma Elisapeta. “Na e ta’ua lo’u tamā.” Na maluelue laumata o Luka, i lona lē malamalama. Na faamanino atu e Penita, “O ia nei o le afafine o Atipale Poleki.”

Na faalatele le pupula o ona mata. Na faalo’ulo’u lona ulu i le itu o i ai Elisapeta. “Talofa e, o ia o se alii ta’uta’ua.”

“O a ni mea e te silafia e uiga i lo’u tamā?” na fesili atu ai Elisapeta. “O ai lenei teineitiiti?”

Na se’i ese e le teineitiiti lona lima mai le lima o le tamaloa na taofia o ia, ma savali atu agai i le laulau. Na ia nofo ifo i lalo i ona tulivae i tafatafa o le laulau ma faalua ai.

“Le teine?” na fai atu ai Luka. “Ou te lē iloa.” O se misiterio. Na ou maua se feau mai lou tamā. O se feau e ala mai le leo, o le leo vevesi ma tautala ma le faanatinati. Na ia faatonuina mai i matou e faatau ni leitiō faasalalau se sefululua, le ituaiga o le Gata Maligi mai le Fale Leitiō, ma ki i se ala leo faasalalau e faapitoa lona malosi. Sa pei lana tautala ua leaga le ulu, i le tele o le mau fuanimera na ia memumemu ai. Na ia mana’o matou te mata’itū ma siaki le Faletele o le malo. Ina ia vaai mo se affi, na te faaolaina le ala leo faasalalau.”

“Affi?” na fesili atu ai Penita.

Na tepa atu Luka faasino i le teineitiiti. “O ia lena.” “Le teine?” na fesili atu ai Elisapeta i lona te’i ma le ofo tele. “Aisea?”

Na lūlū e Luka lona ulu. “Sa matou nofo aitalafu i lou tamā. Na matou faia e pei ona sa ia mana’o mai. Sa matou i ai lava foi i le Faletele ao tagatavaleina o ia, e ui ina sa matou lē iloina o lou tamā o ia. Na matou faatoa iloa mulimuli ane. Ae na matou maua ma mulimuli i le auala o le teineitiiti.

Na Iloilo ma vaavaai atu Penita i le teineitiiti. E tataua ona i ai se faamau poo se lipine pu’e leo, i le tino o le teineitiiti.

“Na matou mulimuli atu ai seia oo i le pa manu, o iina na matou pu’ea ai o ia aunoa ma le iloa e se tasi.”

“Na outou ave faamalosi ia te ia?” o le fesili lea a Penita.

Na faamimigi ona tau’au. “O upu mulimuli lava o le feau faauaealesi, ia gaoia le affi ma aumai i se tagata poo se mea e igoa ia Sikima.”

O upu nei na matua’i oso ai Penita i le te’i.

“Na motu faafuase’i le feau,” fai ane ai le Kipisi, “aunoa ma se isi faatonuga poo se faamatalaga. Ina ua matou maua le teine, na matou gaiōi faanatinati loa. Na matou fefefe ne’i i ai nisi tagata sa sailia ma manana’o i le teine. Nisi sa mafai ona pu’ea lona ta’iala pei o matou. Aemaise ina ua faasalalau solo le sailiga i le itumalo. Ae sa matou matua lē malamalama i le uiga o le tala a le polōfesa e faasino i le Sikima. A o matou taufetuli solo faaamilomilo ma tau saili pe se a le uiga, ae amata loa ona tusitusi ata ma le faavalemalosi o le teine.”

Na ia faasino atu i le teineitiiti, ua tu i luga ma savali aga’i i le puipui. Na ia avane se malala mai le ta’inafi i ona tamatamailima ma tusitusi ai i luga o le puipui, i se auala faavesivesi ma fefoifoia’i, amata i le tasi itu ma toe oso atu i le isi itu.

“E lē mafai ona taofi o ia,” na fa’auau atu ai Luka. “Na ia valivalia le ata o se paka o i ai se vaomatua o laau, ma le ata o le auala laupapa o Vai Papa.” Na luelue atu lona ulu agai i fafo o le faamalama. “O le uma ai o lena, ona vali lea o le ata o se fale i totonu o le vaomatua lena e tasi. Na matou taamilo solo i le paka e su’e, ma le talitonuga o se fale e tāua. E oo ane i le taimi na matou maua ai le nofoaga lenei, ua uma lelei ona ia valiina le ata lena sa faamau mai i le faitoto’a.”

Na faatau pupula atu Luka ia i latou. “O se ata o outou uma. O uo ma le aiga o Foma’i Poleki. E tataua ai ona ou fesili atu ia te outou, tou te iloa o ai lenei Sikima?”

Na se’i ane i fafo e Penita lana pepa faamaonia uliuli. Sa i ai lona ata o loo faamaufaaailoga e le Peresetene. I le tulimanu o le pito i luga sa tusia ai se mata’itusi Eleni, e faa-holokalafi, pe tusia faatafafā tolu.

Sa iloilo e Luka, feliuva’i solo ia iloa lelei le holokalafi. Na pupula lautetele ona mata ina ua ia iloina.

A o latou talanoa, sa faalatalata atu Karai i le teine. Na ia nofo ifo, ma Iloilo lelei le galuega a le teine sa fai. Na milimili lona auvae. Sa i ai se mea na tosina i ai lana vaai. Na sii i luga e Karai sona tamatamailima, e ‘afa e natia i le va o ona tulivae, e pei se tagata

sapo polo i le taaloga o le pesipolo. Na ia faasino aga'i i le teineitiiti.

Na pupula teisi foliga o le teineititi, ma lona ulu sa faasipa teisi i le isi itu. Na pupula ona mata, ae sa le'i mulimuli atu lana vaai i le auala na tusitusi ai lana fasi malala. E pei o le faalavelave o lana amio, e le o le mea lea na faasino ane e Karai.

Na iloa foi e Penita. O le lauulu o le teine, sa susū i le afu o lona fiva, sa faavā teisi ma toso i tua atu o lona taliga. Sa iila mai ai se fasi u'amea. O ona foliga sa le'i taumateina le tutusa lelei ma le mea iila sa pipii i le ulupoo uiga ese.

Pau le eseese, o iinei lea e faapipii i le tagata ola. O le a lenei mea ua aumai e Atipale ia i latou?

A o taavili le mafaufau o Penita i le mau tali eseese, a o Elisapeta ua faasipa atu i tua o le potu. Ia tusi atu faasino i le puipui o le potu. "O mai e vaai i le mea lenei," na ia fai atu ai, o lona leo ua tete i le fefe ma le mata'u tele.

Na solomuli atu Penita i lona autafa, a o ia faasino atu i le ata ua faatulaga mai i le puipui. Mai le mamao sa i ai, o ata ma osiosiga sa pei e leai se uiga, sa amata ona tulaga mai i se ata maopoopo ma sagatonu lelei. Na ia vaavaai pea ma le maofa, a o suia atoa le vaaiga o le ata i totonu o le fa minute uumi.

Na matuā memumemu mai Elisapeta i le segia o lona mau. "O le ata lena... o le ata lena..."

"O le Tai Mahali", na faauma atu ai e Penita.

I totonu o le sãō ma le leai o se pa'ō pe gāsē na sosoo ai ona o le ofo ma le te'i, na latou faalogoina ai se leo tātā patapatatū ae mamao ese.

O le leo o se helikopa, o loo lele maualo, o loo sau agai mai ia i latou.

Na tu sa'o Karai ma tago atu ia maua le teineitiiti. "Ua maua tatou e se tagata."

6.02 am

Kieva, Ukureini.

Na taavale ese Nikolao mai luga o le moega. O le ili o le potu o le fale talimalo na faamālū ma to'a ai lona afu. Na lagona le tiga i lona tua ma ona tau'au sa loloto ai ma'osi'osia. Na tu mālie a'e i luga Elena, faalelea lona lauulu sa lavelave i tua. Na savali atu o ia agai i le fale ta'ele, a o vaavaai atu Nikolao; na ia tau tu a'e i luga, peita'i na ia iloa toe 'afa itula fai le isi ana faatalanoaga.

Ua salalau solo tala o le taumafaiga lē manuia e tagavaleina le senatoa. O le a faasalalau solo ona

ata ma tala i luga o televise a le lalolagi. Ua uma ona ia iloa, sa fana e leoleo le tagata fasioti tagata, ma na uma lona ola e le'i oo i le falema'i.

O le oti ai o lea tagata fasioti tagata, o le a lilo ai i tagata uma, o le taumafaiga e tagatavaleina le senatoa, o se fuafuaga na fafau lelei muamua. E oo lava i le tagata fanafana lafilafi – o se faigaluega i maina mai Polevisikoi, o lona uso sa fasiotia i se faalavelave i le tausaga talu ai – na te le'i mate'ia o ia na faatogafiti potu le auala na filifili ai o ia.

Na faatino ma faataunuu lelei mea uma. Na taimi lelei e Elena lana tago atu ia Nikolao. O se agavaa faapitoa o le teine. Na te mafai ona saili le tali i le aofai o soo se ituaiga avanoa e tupu ai se mea. E laina tutusa lona atamai faa-tausi tusi i pisinisi, ma le au popoto o le lalolagi i mataupu tau le tamaoaiga. Ma o lona ausia ai o tusipasi i su'esu'ega o ituaiga fana eseese, sa leai se faigata ia te ia ona fika lelei le mamao ma le malosi ma le sa'o, o soo se ituaiga pulufana mai soo se ituaiga laau malosi.

O le talitonuina e Nikolao o le atamai lea o Elena, na ia tuu ai lona ola i ona lima i le taeao lenei, e tusa ma le faalavelave na tupu. Ma na ia sao mai ai, o loo ola.

Na maitau pea e le senatoa lana paaga faufautua failautusi, ma lona tosina ia te ia e le gata o ona foliga lalelei, a o lona atamai ma le agavaa i ona tiute. Sa mafaufau foi o ia i lona tina ma lona mana'o ina ia maua sana fanau. O lona tina sa fiafia i la la'ua faiga paaga ma Elena e ala i le tofi faalemalo, ma e ono oo atu i se isi tulaga vava lalata atili. O le a fiafia lona tina i mea na tutupu i lenei taeao.

Na tatagi le telefoni i autafa o le moega. Na savali atu Elena e tali, ona tuu atu lea ia Nikolao.

"O le Ta'ita'i-Aoao Savina Matova," na fai atu ai Elena i le leo ua toe faa ofisa paū aloaia. "Mo le senatoa."

Na tago atu le alii i le telefoni ma le mapuea. E pei ona masani ai, sa taimi lelei e le fafine lana valaau. Atonu ua na maua se tala i le taumafaiga e tagavaleina sa le'i manuia. Mata sa mana'o o ia e fia malamalama i le mea na tupu, ma atonu ai ua tuufesili pe aiseā ua na lē lipoti atu ai. O polokalame faasolo o le isi vaiaso o le a matuā fufusi ma pisi – i ona itu uma – ma faasolo atu ai i le faamauina aloaia o Kenopili. E leai se mea e ono faalētonu pe faaluafesasi.

Sa feliiua'i Nikolao ma uisa i tiga o lona tua.

Na muamua tautala mai le tagata na valaau atu a e le'i fai atu sana upu. "Ua i ai le faalētonu ua tupu, Nikolao." Na ia mapusela. "O le a, Tina?"

10.50pm
Uosigitone.

Na sii a'e e Karai le teineitiiti i ona lima ma faanatinati atu i le lumafale. Sa tuufaafegai le malulu o le po Setema ma le vevela o le fiva o le teine. Na ia lagona le mu o le pa'u o si teine na ati mai lona ofu. O le fiva na oso maualuga a o galue i lana valivaliga ata. O le tago atu o Karai e se'i ese le malala mai ona lima na matapogia ai o ia. Sa malamalama o ia, a o ona mata sa faataupupula i le vasa loloa, ma ona lima ma vae sa malō sasa'o pei ni laupapa, pei o loo ia amoina se pepe mea taalo lapo'a uiga ese. O ona foliga mase'ese'e na atili ai ona iloga le tuufaafegaiga. Na tago atu Karai i ona foliga, ma maitauina le ma'ale'ale o le matagofie o ona laumata. O ai e mafai ona ia faia lenei mea i se tamaitiiti? E ao ona ave o ia i se nofoaga saogalemumu.

O fafo i lumafale, na vaavaai a'e ai Karai i le lagi. O se helikopa uliuli e tasi – fausaga a le militeri – sa lele maualalo i le aai. O le isi na faapepepepe maualuga a'e teisi i le pito o le poloka. Ma lona tolu sa faataamilomilo i le paka i o latou tua.

Sa faa-tafatolu e si'omia lo latou nofoaga. Sa tu mai pea la latou taavale i le auala. O Luka ma lana vaega sa i ai a latou taavale laiti e tolu ituaiga o le Foti sa paka i le auala. Ua uma ona faapotopoto e le ta'ita'i o tagata Kipisi lana vaega. Na ia 'e'ē atu faatonuga i le faa-Romani ma tusi solo ona lima i soo se itu, i lana faatonuga e taape solo. E to'atolu ni tamaloloa na savavali agai i le paka, ma toe vavaeina ai o le tagata ma le itu e alu i ai. O le isi to'alua na tamomo'e aga'i i le auala ma lilo atu i tua i le va o fale. Na ōu le ta'ifau ia i la'ua.

I luma atu, na savali atu ai Koualasaki ma ta'ita'i Elisapeta, o pipii lana telefoni i le taliga, agai i le taavale Linikone o loo i le auala.

O Penita na aga'i atu i se tama'i taavale sa paka i le mea maupu'epu'e, o se Toyota a se tasi o sikulati. Na mulimuli atu i ai Karai. Ua nofo le sikulati i le foouli ina ua faasaoloto e le vaega a Luka.

Na tatala e Penita le faitotoa i tua ma liliu atu ia Karai ma ona lima o fālō atu. Na tuu atu i ai e Karai le teineitiiti.

“Ua vevela tele o ia,” na fai atu ai Karai.

Na luelue lona ulu. “E saogalemumu loa tatou o ave vaai le falema'i. Ua uma na ou valaau ia Kati ma Lisa e lipoti i le ofisa mo faatonuga.”

O Lisa, o Foma'i Lisa Kumini lea, o se foma'i potomasani ma sona faailoga Fomai i le fisiolo. O ia foi le uo teine a le faatonu. O Kapeteni Kati Pariani, o le faiaoga ma le ta'ita'i potosili lea o auunaga ma fesootaiga a le pulega. O le a ia vaaia le galuega lautele i fafo.

“A e muamua,” na fai atu ai Penita, o ona mata sa i le vateatea a o ia tofua atu i totonu o le nofoa pito i tua o le taavale ma le teineitiiti, “e tatau ona tatou talepea le pa puipui lea.”

I le isi itu, na oso ifo ai le tasi taavale Foti faasasa'o i le auala ma ona mōlī sa tapē; o le isi taavale na mimilo faafuase'i ma lele atu i le isi itu faafegai, pasi atu i le Toiota a Penita o ola le afi.

“Talosia e sao le tatou togafiti,” o Karai lea.

A e latou te le'i o ese mai, na faatonu e Penita ia Luka ina ia aumai se leitiō pu'e leo sa latou fa'aaoga e saili ai le teine i le Molo a le atunuu. E pei ona sa faamoemoe ai le faatonu, o nei leitiō o fesoota'iga, e itu lua – e lē gata ina e mafai ona latou lafo ese atu ni feau, a e mafai foi ona latou talia ni feau faauaealesi o lafo mai e nisi. Na faasino e Penita ia Luka le fa'aaogaina o leitiō, i le ki e maua ai se faailoilo faapitoa pe a lafo mai. Sa faapena foi i le vaega uma a Luka. Lea la ua taape solo i le lotoā, ma faasalalau le faailoilo o le teineitiiti, ma maua ai e silia ma le sefulu ma le lua alaleo eseese ua faasalalau solo – o le tele o nei faailoilo e leo tetele atu nai lo le pu'eleo itiiti a le teineitiiti. I totonu o lenei nunumi ma fesēta'iga felavasa'i solo, sa faamoemoe Penita o le a mafai ai ona faasola ese le teine i lalo o fale su'esu'e ma ofisa tutotonu o le Sikima. O iina e mafai ai ona ia faanofoesea tutoatasi le faailoilo a le teine, ma puipui malu ia te ia.

Na laa ese Karai i le isi itu, agai i le Taavale o le Laumua o faatali mai. Ua leva ona faaola e Koualasaki le afi o le taavale ma ua tau lē lava le onosa'i. Sa latou faasaga atu i le Malae vaalele Faavaomalo o Rekeni. Na mafaufau Karai i le ata o le Tai Mahali na tusi i le malala. O le maota tele lenei e i Initia, le atunuu na vaaia mulimuli ai Foma'i Poleki. A e le'i oo mai le teine lenei, ua uma ona fai le fuafuaga a Karai e fa'aauau lana su'esu'ega i Initia, i le sailiga lava o mea na oo i ai Poleki. O le ata lenei na tusia, ua na o se faaopoopoga e faamalosia ai lana fuafuaga.

I Initia, o loo i ai le tagata e toatasi o totoe, e mafai ona ia faasusulu manino le malamalama, i luga o le suesuega o Atipale Poleki ma mea uma sa oo i ai a e le'i nimo ese o ia.

Na tu Elisapeta i tala ane o le faitoto'a matala, a o vaavaai i le lagi ma le fefe. Na ia kiliki tapuni lana telefoni a o taunuu atu Karai i ona tafatafa.

“Sa mafai ona maua atu Foma'i Matasone,” o lana tala lea. “O le paaga a lo'u tamā i le Iunivesitē o Mumapai. A e lē o Mumapai sa i ai o ia. Sa i Agara.” “Agara?” na fesili ai Karai.

“Le aai o Initia o loo i ai le Tai Mahali. O iina sa i ai o ia ina ua ou valaau atu. I le nofoaga tonu lena.”

Na faataupupula atu Karai i le Toiota a o mimilotū mai i totonu, ma sese'e atu i luga o le auala. O le a le mea ua tupu?

I luga a'e, sa faapepepepe ai helikopa. Sa amata ona felelei solo i soo se itu, i le tau faasesē o uaealesi. Na toe taumafai atu Karai mo le taimi mulimuli. “Elisapeta, e te saogalemu pe a e nofo iinei.”

“E leai, ta te o faatasi ma oe. O le a e iloa mulimuli, o Foma'i Matasone e lē o se tagata faigofie. A e na te silafia lelei o a'u. O loo faatali mai foi o ia ia te a'u. Ina ia e maua le lagolago a le polofesa, e tatau lava ona ou i ai.”

Na fetau a la'ua pupula. Na faitau e Karai le fefiloi o lagona na ia vaaia: o le naunauta'i, o le fefe, ma le faanoanoa ua oo i ivi.

“O lo'u tamā, lena e te iloa,” na ia fai atu ai. “E tatau lava ona ou alu.”

“Ma le isi,” na valaau mai ai Koualasaki mai totonu o le taavale. “Faitalia a'u ona vaai faalelei o ia.” Na iloa atu sina 'ata'ata i ona foliga ma lagona. “E lē o se mea lelei lena mo oe, a ea?” na ia memu atu ai ia Karai.

“Lē taitai.”

Na ia faasino atu o ia i totonu o le taavale. Na te le'i finau malosi i lona sau. Na ia masalosalo lava e ono mana'omia ona agavaa a e le'i tini lenei faamoemoe. O lona tamā sa ia matuā alu lava i lona ofisa lē tumau i le Falemataaga o Talafaasolopito Faalenatura. O ia na maua ai e lona afafine lena tulaga i le fale mataaga o Eleni. E i ai se fesootaiga o nei mea uma i tua i le Talefaia – a e pe faapefea?

Ua faatasi ane nei Luka. Na ia lagona mai le vaega mulimuli o le talanoaga. “Ou te alu foi.”

Na lue atu le ulu o Karai. Ua uma ona fai e Penita le fuafuaga, e faatau le lagolago a Luka i le faasolaga o le teine. O se mea lelei ia Karai. Sa i ai pea ni ana fesili mo le tamaloa, faasino i lana faiā ma sootaga ia Foma'i Poleki. O le taitai lenei o le au Kipisi, sa i ai foi se mea faapitoa sa ia tulituliaupū. Na iloa e Karai i ataata lilo i tua o ona mata pogisa.

Ua mautu le tonu, ona oso lea o Karai i le nofoa i luma. O Luka ma Elisapeta sa i le nofoa i tua.

“Pipi'i mau!” na valaau atu ai Koualasaki a o ia faaosolomuli le taavale, pamu le penisini, ma faa'i'i'ī atu pa'u o le latou taavale i luga o le auala tele.

I luga a'e, na mou mālie ese atu le leo o pe'ape'a o helikopa.

Na liliu atu mafaufauga o Karai i fesili faasino i le teine.

O ai o ia? O fea na sau ai?

Na taumulimuli Monike i tamaiti e toatolu. Sa su'e ma mulimuli atu le isi ia i latou, ma latou faatasi i le faleoo i lalo ifo.

Peita'i e lē o se tamaititi.

Na lagonaina e Monike le mamafa o nei mata pogisa i lona tua.

Na latou a'ea'e i luga o sitepu sa faamau i maaomea. O pa puipui maa na tafe ifo i ai se vai, na mase'ese'e ai le auala. Sa va-apiapi le ala sitepu, e manino o se auala mo auunaga. O se savaliga umi le a'e. Ua amo nei e Monike le tama o Piota.

A e le'i oo mai nei, a o malomaloā leo o sailini, na ta'ita'i e tamaiti Monike i lalo o se auala e taamilo i le ana ma taunuu i luga i se auala pefu itiiti. Na matala atu le faitotoa i fasitepu o latou savalia nei. O lalo, na faafeiloai ai Monike i le sui mulimuli ma le tulaga ese o le latou vaega.

O lona igoa o Marata.

“O iinei!” na valaau mai ai Konesetatio mai lumā, o ia taofia le latou moliuila e tasi. Ua taunuu i le tumutumu o le ala sitepu. Na faapotopoto e Monike isi tamiti e to'alua ma latou faatasi atu i ai. O le tama e umi atu na ia faamimigi ma faapupuu i autafa o se faaputuga o latou uta. O luma atu, o i ai se ana puupuu e tau atu i se isi faleoo.

Na tulei atu e Konesetatio se atofaafafa i lima o Monike. Na aveina atu e Monike i le faleoo ma tuu lona lima i le faitotoa. E mafanafana.

Na ia liliu ane, a o a'e atu le sui mulimuli o le latou pā'i i totonu o le ana mai sitepu. E valu sefulu pauna le mamafa, ma lona umi e tolu futu, a o ia tu tapulima i le tasi ona lima. Sa ufitia lona tino i le fulufulu vaivai lanu uli, vaganā ona foliga, o lima ma vae. O le fulufulu i ona foliga ua liua i le enaena siliva.

E manatu Konesetatio o le manukī fafine ua siliva ma le onosefulu tausaga le matua.

(Fa'auau Sulu Samoa Tesema 2022)

OSIGA FEAGAIGA EFKS SAOLUAFATA

O le Toeaina o le Pulega Anoamaa, Matagaluega Apia Sasa'e, susuga Roma Enosa FT na taitai le sauniga sa osia ai le feagaiga a le EFKS Saoluafata ma lo latou faifeau, susuga Onosa'i Soo ma le faletua ia Toafa. O le Aso Farai 4 Novema 2022 na faia ai lea sauniga i lo latou malumalu lava. Na molimau le sui o le Aulotu i Saoluafata e tusa ma la latou filifiliga, sa faigofie lava i le fesoasoani mai o le Atua, o la sa faamoemoe i ai i la latou faiga filifiliga, ma tofia ai le faifeau ma lona faletua mai Savaia Lefaga e fai mo latou faifeau. Sa tali molimau foi le susuga Onosa'i e tomua i le agaga vivii i le Atua, *"Ou te vivii atu ia te oe ma lo'u loto atoa; ou te ta'uta'u atu foi ou vavega uma. Ou te fiafia ma ou olioli ia te oe; ou te pese lava i lou suafa, le Silisili ese."*

O le aso 6 Iuni 2022 na oo atu ai le sāvali a le Aulotu o le susuga Petelo Puga FNA, o A'oa'o Fesoasoani ma le Laulau/Komiti a le Aulotu e momoli atu lo latou mana'o. Ma sa la'ua talia ma le loto maualalo ma le faafetai i le Atua. Sa faaleoina foi la la'ua faafetai i matua faaleagaga mo la latou lagolago ma le tapuaiga, ua auala mai ai le valaau a le Atua: Susuga Clay Tofilau FS & Eseta (EFKS Savaia-tai), Lafolafo Amituanai FS & Luisa (EFKS Saasaai), Feata Perelini FS & Lisa (EFKS Lotofagā), Keneti Leupepe FS & Faaleleiga (Savaia & Tafagamanu) le Toeaina Faatonu (ua maliu) ia Urika Saifoloi FT, susuga Roseti Faamausili FS, Poka Maua FT & Malo (matua penisione) faapea le tapuaiga a aiga ma o la'ua nuu i Savaia, Saasaai, Lotofagā. Sa ia ta'ua foi le faafetai i le susuga Fuatimu Posepe FS ma le auuso faiaoga i le Kolisi Nuuausala, faapea le Kolisi Leulumoega Fou.

O le au mau tofi o le sauniga sa faitau e le susuga Vaigalo Maua FS (EFKS Lufilufi) le Tusi Paia (FT: Salamo 107:23-32, FF: 1 Kori.5:1 - 12), o le lauga mo le faifeau ma lona faletua na saunia e Sakaio Maiava FS (EFKS Lalomauga), a o le lauga mo le Ekalesia sa faia e Alo Pita FS (EFKS Fusi, Saoluafata). O pese ma viiga o le Atua sa saunia lelei e le Afaipese lava a Saoluafata. O i latou na valaaulia e faafeiloa'i, faatalofa ma faamanuia i le faifeau ma lona faletua, e aofia ai le afoaga Taitaifono Komiti Au Toeaina, o le KMTA foi lea o le Matagaluega Apia Sasa'e, susuga Asotasi Gu Time FT, Misipalauni Faatau FT, Nomeneta Simanu FT,

Pati Vili FT, le afoaga ia Tagaloa Tuala & Faletua, o sui o le afoaga aofia ai le faletua ia Pereseti Fili Matalavea, ma sui o le Mafutaga Tina o Savaliga Asotasi ma Matalena Pati Vili (le Taitaifono o Faletua o le Au Toeaina). O le sauniga na faatumulia i le afaigaluega tofofi a le Atua i totonu o le Pulega Anoamaa ma le Matagaluega Apia Sasa'e, le Pulega Lefaga ma le Matagaluega Aana, o matua penisione, le paia o aiga na lua faapea uo ma paaga a le susuga Onosa'i ma Toafa. Na mamalu foi ma maua luga le aso i le auai o le paia faalemalo, e pei o le afoaga i le Sui Faipule o le itumalo Vaa o Fonoti, le afoaga Mau'u Siaosi Pu'epu'ema. Sa iloga ona sasa'a faaoti le utu a le faimeia mai le au faifauga tofofi o lea a so, e tomatauina ai le faifeau ma le faletua, faapea le Aulotu i o latou tiute ma pito laau o le feagaiga ua osia. Ma saga faamausali ai i le saunoaga a le Toeaina le Ta'ita'i o le Sauniga ia Roma Enosa FT.

Sa taua luga le sauniga i le Sakarameta o le Talisuaga Paia a le Alii na ta'ita'i e Onosa'i. Ona mapu atu lea o le ta'ita'i o le sauniga ma le mamalu tele o le faapotopotoga, i le maota o le galuega sa sila maimoa ai i le le o le Feagaiga na saunia e le Ekalesia i Saoluafata, e tusa o le tu ma le aganuu mamalu a le atunuu. Sa faapea foi ona fa'aali le valevale alofa o le Ekalesia i la latou feagaiga, faapea le soifua tautua masani faa-EFKS, e ala i taumafataga ma fa'aalologa maua luga e masani ai i aso tetele faapenei. O Onosa'i ma Toafa ua sui tulaga i le galuega i le EFKS Saoluafata, ina ua malolo penisione le susuga i le Toeaina ia Limua'a Samuelu FT ma Daru mai le galuega i le tausaga 2021; na amata galulue i la'ua i le tausaga 1982, ma e faia lenei lomiga ua maliu le susuga i le toeaina.

O le susuga Onosa'i na i'u mai Malua i le tausaga 2009, a e faau'uina i le tofi Faifeau Samoa i le 2013. Ua 13 tausaga o tautua i le galuega a le Ekalesia, e ala i le galuega faa-faiaoga i Kolisi a le Ekalesia, faapea le lagolagosua i susuga faafeagaiga ma faletua i le galuega i totonu o nuu ma Aulotu sa tautua ai. O le ulua'i Osiga Feagaiga lenei i Anoamaa, ua ta'ita'iina e le susuga ia Roma Enosa FT, o le faafeagaiga a le EFKS Manunu, talu ona tula'i mai e sui tulaga ia Limu Samuelu FT, talu foi ona vaeluaina le Matagaluega Apia Sasa'e ma Vaimauga. Talosia le alofa o le Atua faamanuia le feagaiga fou.

O E UA FAI I LAGI FOLAUGA

TAGIITAMALI'IELEILEILUA

(24/9/1930 – 30/8/2022 (91+11+7))

O Tagiitamalii Ieli Leilua o le faletua o le faifeau, a o le tina matua o le Aulotu EFKS Tanoalei'a. Sa soifua mai i le Aso Lulu, 24 Setema 1930 a e na faamanavaina e lona Matai ana feau i le Aso Lua, 30 Aokuso 2022, ua tu lalata i le 92 tausaga o lona soifua. O lona tamā o Sialeipata Tuilua'ai Faasuamaleaui Ta'inafi ma Manufeao Kerisimasi Viliamu, a o lona tina o Vaimauga Manufeao Saipale Manogiamanu. E to'a iva le fanau, a o e na tupuga mai i lenei tina e 51.

O ia o se tamaitai tausi soifua mai le 1948 – 1951. Sa faaiipoipo atu i le alii A'oa'o Malua o Ieli Leilua i le Aso Toonai 15 Ianuari 1955 (ina ua 24 ona tausaga) ma faai'uina ai lo la'ua taumafai i le 1956. Sa tausia le Aulotu EFKS Fusi Safotulafai, EFKS Faga i Amoa Savaii, sa galulue foi i le EFKS Samamea Fagaloa, faapea le EFKS Satalo Falealii.

Ina ua maliu le faifeau ia Oketopa 1980, ona oo mai lea o Tagiitamalii i le aiga ma nofo ai, ina ua 50 tausaga o lona soifua, seia oo ina valaau le Atua ia te ia. Mo le 42 tausaga o lona soifua talu ona foi mai i le aiga, sa auai ma lagolagosua malosi i le atina'ega o le Ekalesia i Tanoalei'a i tausaga e tele. Sa auai i le Aufaipese, Autalavou, Faiaoga Aso Sa, faapea le Mafutaga Tina. O nei galuega sa faato'ā tuu lava ina ua oo ina matua lona soifua. O se aiga tautua faamaoni, ma galulue malosi mo soo se itu o le Aulotu e ati a'e le Tino o Keriso i lenei tovine. O le aiga sa nafa ma le tausiga o faifeau ma o latou aiga i tausaga e tele, sa autovaa mai e tausi le Aulotu i Tanoalei'a e oo mai i le aso nei.

O lona sauniga faaleaiga sa faia i le Aso Tofi, 15 Setema 2022, sa ta'ita'i e le susuga Viliamu Leilua FS, o le alo faifeau o le tina ia Tagi, a o le faafeagaiga taulagi a le EFKAS 'Aua i Amerika Samoa. O le susuga Filemoni Crawley FS sa faia tatalo, a e faitau Tusi Paia le susuga Viliamu Sialeipata Viliamu AM, o se tasi o fanau lava a le tina. Sa toatele na molimau o le fanau, fanau a fanau, ma fanau a fanau a fanau i

la latou mafutaga ma le tina ua āsoa. Ma meaalofo na faasoa mai mo i latou, ua afua ai ona faamanuiaina lo latou ola, ona o lo latou tina ma lana tatalo e lē aunoa i aso uma.

O lona toe sauniga sa faia lava i le malumalu EFKS Tanoalei'a i le itula 10 i le taeao o le Aso Faraile, 16 Setema 2022. Sa matuā faatumulia le malumalu i lea aso, sa auai le aufaigaluega tofofi a le Atua, i susuga Toeaina, Faafeagaiga ma Faletua i soo se fata faitaulaga, o aiga na lua, o uo ma aumeamamae. Sa auai foi le Pulega a le Vaimauga i Sisifo. O a'u sa ta'ita'ia le sauniga ma fai le molimau faaleagaga. O susuga Ioanatanana Teo FS sa faaulufaleina le sã o le tina, o Semikueva Faatoafe FS na faitauina le Tusi Paia, o Siaosi Salesulu FS sa tatalo, ma Uele Iese Uele FS na saunia le Upu faamafanafana mo le fanau, le aiga ma le tapuaiga. Sa molimau le susuga Viliamu Leilua FS fai ma sui o le fanau, o le faletua ia Alofa Emma Viliamu Crawley sa molimau fai ma sui o fanau a fanau. O le susuga Vaaelua Patu FT sa fai ma sui o le aiga tamā, e molimau i le sao o lenei tina i le aiga. A o le fetalaiga a Manogiamanu Etuale sa fai ma sui o le aiga tinā, e molimau i aogā e tele o lenei tina i le aiga ma le nuu.

O la'u molimau i lona soifua faaleagaga na matua i upu a le tupu o Lemueli, "*Avatu ia ia te ia le fua o ona lima, o ana galuega foi e viia ai o ia i faitoto'a.*" *Faata 31:31.* Sa faamae'a ona toe sauniga i lona oliolisaga tumau i lona aiga i Tanoalei'a, Vaivase-uta, ma matou faatofa atu ai i le tina ia Tagiitamalii Ieli Leilua, i le Pese faatofa a le au kerisiano, *Talofa uso e, tofaina oe, Ua sau le itupo e malolo, E ala oe pe a mavae le po... Tofa Tina,* manuia lau malaga, tatou te toe feiloai i se aso.

***Saunia: Susuga Enefatu Lesā FT,
EFKS Tanoalei'a,
Matagaluega VAIMAUGA***

TALIILAGI MOKIANA TAISE IOAPO

7/9/1943 - 5/11/22 (79+1+30)

O le faletua ia Taliilagi sa mua'i galulue ma le susuga i le Alii Faife'au ia Ioapo Taise Ioapo FT, i le Ekalesia i Siumu po'o le tausaga e 1976 i le 1983. Na osi feagaiga ma le Ekalesia i Vailele i le 1983 ma avea ai i lāua ma Faife'au Toeaina o le Pulega a Vaimauga i Sisifo i le 2001. Sa filifilia le Tinā e avea ma Taitaifono o le Mafutaga Aoa o Tinā EFKS. Na tu'umālō le Toeaina o Ioapo FT ia Aokuso 2009, ma o lo'o lagomau i lumāfale o le Malumalu EFKS Vailele. Na taliu le Tinā i lo lā fānua i Vailele uta ae sa fa'auau pea ona avea o se matāfale lotu o le Ekalesia i Vailele seia o'o ina amia e le Atua i le aso 5 Novema 2022, i le 79 tausaga o lona soifua.

Tautai a'e Tinā-Ua malo le toa—Ua faamalo le tau.

Ua lologo faa-Tutuila le faafofoga a le aofia i le molimau a le toatele I GALUEGA LELEI na faia e lenei tina. Tau ia o lenei – Ia fai pea ma viiga sili o le Atua, le ola na ia aumaia, lea ua toe mapu atu i ona aao.

Sa ta'ita'i i le tama o le Pulega ia Enefatu Lesa (FT) i ona toe sauniga i le aso 19 o Novema 2022. Sa molimoli mai lona sa i totonu mo lona toe sauniga e le susuga ia Falenu'u Tagataese (FS). O le Tusi Paia na faitauina e Petaia Leavai (FS), o talosaga o Iese Uele (FS), a o le lauga o Semikueva Faatoafe (FS). O le molimau a le Ekalesia sa saunia e le tinā matua ia Siupolu Seimaleula ma Siaso Salesulu (FS) Sa faai i lona oliolisaga tumau i lona maota i Vailele ma sa lagiina o le pese faatofa a le Au Kerisiano: "Talofa Uso e, Tofaina oe."

Taliilagi -Ia tafi mala lau faigamalaga ma ia maua lou nofoaga tumau i le malo o le Lagi.

Saunia: Siaso Salesulu FS

EFKS Vailele.

MATAGALUEGA VAIMAUGA

PEPEMAUA SALU TANUVASA

1/8/1959 - 25/10/2022 (63+2+25)

O le tinā ia Pepemaua Salu Tanuvasa na soifua mai i lona nuu i Nofolii Upolu, i le Aso Toonai, 1 Aokuso 1959 a e na maliu i lona aiga i Porirua Ueligitone Niu Sila i le Aso Lua 25 Oketopa 2022, ua atoa ai le 63 tausaga + 2 masina + 24 aso o lona soifua. Sa a'oa'oina lava Pepemaua Salu Tanuvasa i le a'oga a le faifeau i Nofolii faapea foi le a'oga Tulagalua a Nofolii, o le a'oga Itumalo a Aana, ma le Kolisi i Leulumoega Fou, fa'au'u i le A'oga Faafaiaoga i Malifa ma fa'au'uina ai o se faia'oga a le Malo o Samoa. Sa avea ma faia'oga a le malo o Samoa mo nai tausaga, ona siitia mai lea i Niu Sila ma alaala ai.

Sa galue i nisi o galuega i Niu Sila faapea foi ona toe finau ma tauivi i le itu tau a'oa'oga e faalatele le atamai i nisi o a'oga i Niu Sila ma fa'au'uina ai i ni faailoga taualoa. Sa galue o se tasi o Ofisa Sinia i le Matagaluega o Tau i mo Faalavelave Faafuasei (ACC) i Niu Sila, seia o'o ina valaau lona Matai a o lo'o faapea ona fai. O se tinā loto alofa, tausafia i totonu o le aulotu. E soifua tauivi ma finau, o ia o se faia'oga Aso Sa, e faamaoni i ona tiute. O se tinā o loo i ai meaalofo tāua a le Atua. Sa ia faaogā tataua foi. E mulimuli atu pea ana galuega lelei ia te ia.

O le aso 30 Oketopa 2022 itula e 5.30pm lona sauniga faaleaiga, faia lava i le malumalu o lana aulotu EFKS Ketesemane. Sa ou ta'ita'i i le Sauniga. Sa molimau uso, tuagane, aiga, uo ma aumeamamae, aemaise foi lana aufaigaluega. O le susuga toeaina o Tapelu Aupaau o le faafeagaiga a le Ekalesia Faapotopotoga a le Atua i Taupo sa saunia le Lauga. O le susuga faifeau ia Onosai Nofoaiga FS sa saunia Talosaga.

O lona toe sauniga sa fa'ataunu'uina i le aso 1 Novema 2022. Sa ou ta'ita'i ma molimau i lona soifua faale-agaga ma saunia le upu faamafanafana. O le susuga faifeau Onosai Nofoaiga FS sa molimoli mai lona sa i le malumalu mo ona toe sauniga. O le susuga i le A'oa'o Fesoasoani ia Iopu Tagatauli sa fofogaina le Afioga Paia, a o le susuga i le A'oa'o Fesoasoani ia Tuuvaamalefoe Misi Misipati sa saunia talosaga. Sa molimau lona uso matua, le faletua ia Anapae Tapelu Aupaau, ma lona tuagane o Onosai

Tanuvasa e fai ma sui o le aiga faapea foi ona molimau le alii pule o lana aufaigaluega (ACC). Na faaii lona toe sauniga i lona oliolisaga tumau i Whenua Tapu ma faamavae atu ai i le pese a le au kerisiano, Tōfā tōfāina oe. O upu taumavae a lo tatou Alii, “Lo’u Tamā e, ou te tuuina atu lo’u nei agaga ia te oe.” Ia manuia lau malaga Pepemaua Salu Tanuvasa.

*Saunia: Susuga Kuatemanu Ulutui FS
EFKS Ketesemane
Matagaluega Niu Sila Saute*

ILAI SA PUPUALII **MULIPOLA ALO APELU**

9/4/1934 - 25/8/2022 (88+4+17)

Na soifua mai i le Aso Gafua, 9 Aperila 1934 i lona aiga i Paia i Savai’i. A e faamanava e le Atua ana feau i le Aso Tofi, 25 Aokuso 2022 i lona aiga i Matautu-Uta (Apia). O ona matua o So’oalo Sepulona ma Siala Mauai, ma e toafā ona tuagane a e toatolu ona uso. Sa faaipoipo atu ia Pupualii i Mulipola Alo Apelu i le Aso Lua, 19 Setema 1961, E toaono o la alo a e toasefulu ono e na tutupu mai ai. Sa a’oa’oina i le A’oga Tulagalua i Paia, Malifa, sosoo ai ma Leifiifi Intermediate School, ma le Western Samoa Nursing School. Sa galue ma tautua i le Malo o se tama’ita’i Tausima’i Pasi Faauuina (1958-1979). Sa tautua o se matron i le Kolisi o Samoa (1980-1997).

Sa molimauina e le fanau ma lona aiga o se tinā amiolelei, alofa ma osi aiga. E tutusa ia te ia fanau uma o le aiga faapea fanau a ona uso ma tuagane. E moni ai lava le faalupega o tinā, o ia o le pae ma le auli i totonu o lona aiga.

Ma te taunu’u mai i le galuega i le tausaga e 2005 o loo galulue Ilaisa ma le tamā o le aiga i lo la tofi A’oa’o Fesoasoani. Sa tautua o se faiaoga Aso Sa, sa auai i le Autalavou faapea fo’i le Aufaipese ma le Mafutaga a Tinā. O se tinā e toaga i le lotu, faatoa lē auai lava i sauniga faitele ona ua matua lava lona soifua. E sagisagi fiafia i taimi o asiasiga a le faifeau, o ana saunoaga faalototele i le galuega, faatasi ma lana tatalo faifaipea, o ia lava o le auauna a le Atua. O le tinā e faatuatua ma mata’u i le Atua, sa tautua ai i lona soifuaga atoa. O le tinā o Ilaisa ma le fanau o loo saunia le sakarameta o le Faamanatuga i taimi uma. Ua leva ona sauni le tinā i le valaau mai o lona matai.

O lona toe sauniga sa faia i le EFKS Matautu-Uta (Apia) ma sa ou ta’ita’iina, faaulufale e le faifeau o Alo Mamea Pita (FS), Tusi Paia: Loia Fiu Kolia (AM), Tatalo: Faasalafa Alaovae (FS) a’o le upu faamafanafana o Leo Faamaile (Fesoasoani Katoliko). Sa molimau le fanau, Peresetene o Tausi Soifua, sui o le aiga, Mafutaga Tinā faapea le tinā o le galuega, a o a’u sa ou faia lona molimau faa-le-agaga. Na mae’a le sauniga i Matautu-Uta ona molimoli atu lea o le sā o le tinā i Ululolua i lona oliolisaga tumau, sa ou ta’ita’ia lona sauniga i le tuugamau ma faamavae atu ai i le pese faatofa a le au Kerisiano.

E silisili i le finagalo o le Atua le oti o ona tagata amio Atua.

*Saunia: Susuga Elisaia Kolia FS
EFKS Matautu-uta,
Matagaluega APIA*

TO’A LUA SUI O LE TAUSAGA **1993, MALILIU I LE MASINA**


MOTUGA MATAGIFS

O le faafeagaiga taulagi a le EFKS Tanumalala, Pulega Lefaga & Faleseela. Na soifua mai le Aso Gafua 23 Novema 1964, na i’u mai Malua i le 1993, osi feagaiga ma lana Aulotu i Tanumalala i le 1994, ae maliu i le Aso Lulu 16 Novema 2022. O le gasegase na maliu ai. O ona toe sauniga na faia i le aso 1 Tesema 2022, na ta’ita’iina e le susuga Nomeneta Simanu FT ma le au mau tofi o le Pulega, ma o loo lagomau i lona aiga i Safaato’a-uta, Lefaga. Ia faamaise le Alii Toetu i le faletua ia Sioi ma le fanau ma aiga, ma le EFKS Tanumalala.

ULIMASAO APISALOMA

O le faletua o le faafeagaiga EFKS Aleisa Sasa’e, susuga Apisaloma Taeleipu FS. Na i’u le susuga Apisaloma mai Malua i le 1993, na la’ua faaipoipo lea ma osi feagaiga ai ma le EFKS Aleisa Sasa’e. O ona toe sauniga i le aso 30 Novema, sa ta’ita’i le KMTA Faleata, susuga Misipalauni Faatau FT ma le aufaigaluega o le Pulega sa mau tofi. Sa molimau Apisaloma, le fanau ma sui o le aiga, aofia ai le faletua o le Taitaifono Fono Tele, Susana Tunumoso Soliola Iosia. O loo lagomau i lona aiga i Vailoa Faleata. Ia faamaise le Atua i le susuga le faafeagaiga ma le fanau ma aiga, aemaise le EFKS Aleisa Sasa’e.
Faatonu Sulu Samoa

TALIILAGI MOKIANA
TAISE IOAPO



TAGIITAMALII IELI
LEILUA



PEPEMAUA SALU
TANUVASA



ILAISA PUPUALII
MULIPOLA ALO APELU

